

# „Chcemy so z pčółku identifikować“

Pěstowarnja „Chróścán kołć“ je we wobłuku programa „Simul+“ 5 000 eurow dobyła. Wo tym, kak tute pjenjezy nětko wužiwa, je so Maximilian Gruber z nawodnicu kubłanišća Kerstin Šołčina rozmołwjał.

*Čehodla je so pěstowarnja „Chróścán kołć“ wo spěchowanske srědki we wobłuku programa „Simul+“ požadala?*

■ **K. Šołčina:** Prěnjotna ideja wuchadžeše z teama, wšako je mi participatiwne, zhromadne džěło w a z teamom jara wažne. Tak stajichmy próstwu, kotraž wobsahuje wosebje zhromadny spěw wo „Chróścán kołću“, podobnje spěweje, kotryž eksistuje hižo w Radworskej katolskej pěstowarni. Spěw bě srjedžišćo našeje próstwy, hladajo na to, zo su džěći, pedagogiski personal kaž tež starši do spěwa integrowani. Dale hdže wězo wo pčółku, wšako mjenujemy so jako kubłanišćo „Chróścán kołć“. Chcemy pčółku tematizować: Žiwjenski wobswět, natwar, kotru funkciju wona ma.

*Za čo wužiwaće pjenjezy nětko, hdyž sće je dobyli?*

■ **K. Šołčina:** Hłowny nadawk je nahrawanje spěwa, mastering tutoho kaž tež workshop z džěćimi. Józef Dónat jako mlodostny z wjeski je nam tekst a melodiju napisał a nas aktiwnje přewodzał. Tutón spěw ma so džensa we wobłuku našeho mejemjetanja zhromadnje z ka-

pału Holaski a projektow chórora předstajić. Dale smy hižo pčółarski ekwipment nakupowali. Jako dalši nadawk smy sebi zestajenje dwurěčnych wuknjenskich tafłow kołowokoło pčółki wuzwolili. Tute chcemy wupójsnyć, zo móhli starši abo tež eksterni je čitać a džěći wobhladać. Jako poslednje chcemy bookije a stickery wobstarać, wšitko na pčółku wusměrjene. Tež naša zahroda je do projekta integrowana. Tak chcemy kwětki wusyć, kerki a štomy nasadźeć. Za to smy hižo mału zahrodu zhromadnje z džěćimi a staršimi natwarili. Na kóncu ma wšitko być tematiska jednotka.

*Što konkretnje chceće z tutymi projektami dospěć?*

■ **K. Šołčina:** Chcemy, zo wšitcy akterjo so jako „Chróścán kołć“ z našim domom

a pomjenowanom identifikuja. To je hłowny zaměr. Za to je trjeba, so z tematiku zaběrać. Druhi zaměr je, kotryž je nam njesměrnje wažny a wobsahuje tež wodžacy wobraz SŠT, zo so jako team z džěćimi a staršimi stajnje zaso zhromadnje na puć procesa podawamy w aktiwnym, participatiwnym ale wosebje awtentiskim wustupowanju.

*Kajki je časowy ramik, w kotrymž maja so projekty zwoprowadzić?*

■ **K. Šołčina:** Hač do kónca lěta 2023 maja wšitke projekty wotzamknjene być. Na kóždy pad chcemy projekt z nowej ideju, kotraž je so wosrjedź procesa wuwijała, dale plesć. Dajmy so překwapić! Prěni krok pak budže premjera spěwa na mejemjetanju na džensnišim pjatku.

*Wutrobny džak!*